

**NOVAM ECCLESIAM SEU ORATO-
RIUM PUBLICUM,**

UT IBI SANCTISSIMUM MISSÆ SACRIFI-
CIUM CELEBRARI POSSIT.

Sacerdos novam Ecclesiam de licentia
Episcopi benedicturus, ut in ea divi-
num sacrificium Missæ rite celebretur,
stola ac pluviali albi coloris indutus,
aliquot Sacerdotibus et Clericis adhi-
bitis, praelata Cruce media inter duos
Clericos deferentes cereos accensos, ma-
ne procedit ad primariam Ecclesiæ, vel
Oratorii januam: ubi stans capite aper-
to, conversus ad eam dicit absolute
Orationem.

Actiões nostras, quæsumus Dómine,
adspirádo præveni, et adjuvándo pro-
sequere: ut cuncta nostra orátio et o-
perátio a te semper incípiat, et per te
cœpta finiátur. Per Christum Dnm nos-
trum. R. Amen.

Deinde inchoat Antiphonam: Aspér-

ges me, etc. et Clerus alternatim dicit
Psalmum Miserére, etc. (ut ad calcem
libri): in fine Glória Patri.

Interim circumdant exterius Eccle-
siam (quæ intus debet esse vacua et
nuda, et pariter Altaria nuda, excluso
populo, donec absoluta sit benedictio),
et Sacerdos accepto aspergillo ex her-
ba hyssopi, ad ejus dexteram se con-
vertens, parietes Ecclesiæ in superiori
parte, et in fundamentis, cum aqua be-
nedicta aspergit, dicens:

Aspérges me, Dómine, hyssópo, et
mundábor: lavábis me, et super nivem
dealbábor.

Reversi ad locum, unde Processio
initium habuit, repetita Antiphona a
Clero, Sacerdos stans ut prius versus
Ecclesiam dicit: Orémus.

Ministri: Flectámus génua. R. Le-
váté.

Oratio.

Dómine Deus, qui licet cœlo et terra
non capiáris, domum tamen dignáris

habere in terris, ubi nomen tuum júgiter invocétur: locum hunc, quæsumus, beátæ Mariæ semper Vírginis, et beáti N., omníumque Sanctórum intercedéntibus méritis, seréno pietátis tuæ intúitu vísita, et per infusióne[m] grátia[e] tuæ ab omni inquinaménto purífica, purificatúmque consérva; et qui dilécti tui David devotióne[m] in filii sui Salomónis ópere complevísti, in hoc ópere desidéria nostra perficere dignéris, effugiántque omnes hinc nequitiæ spirituáles. Per Dóminum nostrum Jesum Christum Fílium tuum: qui tecum vivit et regnat in unitáte Spíritus Sancti Deus, etc. **R.** Amen

Qua finita Oratione, omnes bini in Ecclesiam intrantes, ad Altare majus procedunt, Litanias decantes (ut ad calcem libri).

Ubi dictum fuerit: Ut ómnibus fidelibus defúctis réquiem aetérnam donare dignéris: Te rogámus, audi nos; surgit Sacerdos, et intelligibili voce dicit:

Ut hanc Ecclesiám, et Altáre ad honórem tuum, et nomen sancti tui N., purgáre, et bene ✠ dicere dignéris: Te rogámus, audi nos.

Cum dicit benedícere, manu dextera benedicit Ecclesiám, et Altare: deinde, ut prius, genuflectit, donec perficiantur Litanie; et Cantores prosequuntur:

Ut nos exaudire dignéris, Te rogámus, audi nos.

Fili Dei, Te rogámus, audi nos.

Agnus Dei, etc.

Dicto ultimo Kyrie eléison, Sacerdos stans, dicit: Orémus.

Ministri: Flectámus génua. **R.** Leváte.

Pravéniat nos, quæsumus Dómine, misericórdia tua: et intercedéntibus ómnibus Sanctis tuis, voces nostras cleméntia tuæ propitiatiónis anticipet Per Christum Dóminum nostrum.

R. Amen.

Tum distans ab Altari congruente spatio genuflexus, et se signans, dicit:

Deus, in adiutorium meum intende; et statim surgit. Clero respondente: Dómine, ad adiuvandum me festína. Ipse vero stans dicit: Glória Patri, et Filio, et Spiritui Sancto. Chorus respondet: Sicut erat in principio, et nunc, et semper, et in sæcula sæculórum. Amen.

Postea Sacerdos dicit. Orémus.

Ministri: Flectámus génuá. R. Leváte.

Oratio.

Omnípotens et miséricors Deus, qui sacerdotibus tuis tantam præ cæteris grátiam contulisti, ut quidquid in tuo nómine digne, perfectéque ab eis ágitur, a te fieri credátur: quæsumus imménsam cleméntiam tuam, ut quidquid modo visitatúri sumus, visites; et quidquid benedictúri sumus, benedícas; sitque ad nostræ humilitátis intróitum, Sanctórum tuórum méritis, fuga dæmonum, Angeli pacis ingrèssus. Per Dóminum nostrum Jesum

Christum Filium tuum: qui tecum vivit et regnat, etc. R. Amen.

His dictis, inchoat Antiphonam: Benedic, Dómine, domum istam nómini tuo ædificátam, cum tribus Psalmis sequentibus, videlicet:

Psalmus 119.

Ad Dóminum, cum tribulárer, clamávi: * et exaudivit me.

Dómine, libera ánimam meam a lábiis iníquis, * et a lingua dolósa.

Quid detur tibi, aut quid apponátur tibi, * ad linguam dolósam?

Sagítte poténtis acútæ, * cum carbónibus desolatóriis.

Heu mihi, quia incolátus meus prolongátus est: habitávi cum habitántibus Cedar: * multum íncola fuit áni-
ma mea.

Cum his, qui odérunt pacem, eram pacíficus: * cum loquébar illis, impugnábant me gratis.

Glória Patri. Sicut erat.

Psalmus 120.

Levávi óculos meos in montes, * unde
 veníet auxiliúm mihi.

Auxiliúm meum a Dómino, * qui fe-
 cit cœlum et terram.

Non det in commotióem pedem
 tuum: * neque dormitet, qui custódit
 te.

Ecce non dormitábit, neque dórmiet,
 * qui custódit Israël.

Dóminus custódit te, Dóminus pro-
 tectiô tua, * super manum dexteram
 tuam.

Per diem sol non uret te: * neque
 luna per noctem.

Dóminus custódit te ab omni malo:
 * custódiat ánimam tuam Dóminus.

Dóminus custódiat intróitum tuum,
 et éxitum tuum: * ex hoc nunc et us-
 que in sæculum.

*G*lória Patri. *Sicut erat.*

Psalmus 121.

Lætátus sum in his, quæ dicta sunt
 mihi: * in domum Dómini íbimus.

Stantes erant pedes nostri, * in átriis
 tuis Jerúsalem.

Jerúsalem, quæ ædificátur ut civi-
 tas: * cujus participatió ejus in idípsum.

Illuc enim ascendérunt tribus, tri-
 bus Dómini: * testimoniúm Israël ad
 confiténdum nómini Dómini.

Quia illic sedérunt sedes in iudicio,
 * sedes super domum David.

Rogáte quæ ad pacem sunt Jerúsa-
 lem: * et abundántia diligéntibus te

Fiat pax in virtúte tua: * et abun-
 dántia in túribus tuis.

Propter fratres meos, et próximos
 meos, * loquébar pacem de te.

Propter domum Dómini Dei nostri,
 * quæsivi bona tibi.

*G*lória Patri. *Sicut erat.*

Ant. *Benedic, Dómine, domum is-
 tam nómini tuo ædificátam.*

*Interim aspergit interius parietes in
 parte superiori et inferiori, inchoans
 aspersionem a parte Evangelii, dicens:
 Aspérget me, etc. tum ad Altare re-
 versus, dicit: Orémus.*

Ministri: Flectámus génuu. R. Leváte.

Deus, qui loca nómini tuo dicánda sanetíficas: effúnde super hanc oratiónis domum grátiam tuam; ut ab ómnibus hic nomen tuum invocántibus auxílium tuæ misericórdiæ sentiátur. Per Dóminum. R. Amen.

His peractis, dicitur Missa de tempore occurrenti, vel de Sancto.

¶ Ecclesia vero, quamvis a simplici Sacerdote, ut supra, sit benedicta, ab Episcopo tamen consecranda est.

RITUS RECONCILIANDI

ECCLESIAM VIOLATAM,

SI NONDUM ERAT AB EPISCOPO CONSECRATA.

Ecclesie violatæ reconciliatio per Sacerdotem ab Episcopo delegatum fiat

hoc modo. Altare Ecclesiæ omnino nudetur, provideaturque, ut Ecclesia possit libere circumiri tam exterius, quam interius, si fieri potest. Paretur vasculum cum aqua benedicta, et aspergillum de herba hyssopo factum. Sacerdos indutus amictu, alba, cingulo, stola, et pluviali albo, adhibitis aliquot Sacerdotibus et Clericis, procedit ad primariam Ecclesiæ portam, ubi stans, Antiphonam incipit, dicens, Clero prosequente:

Aspérges me, Dómine, hyssópo, et mundábor: lavábis me, et super nivem dealbábor.

Psalmus: Miserére, etc. (ut ad calcem libri,) totus cum Glória Patri.

Quo finito, Antiphona repetitur. Interim dum Antiphona, et: Psalmus dicuntur, Sacerdos cum aqua benedicta aspergit in circuitu extrinsecus Ecclesiam, et Cemeterium, simul aspergendo alternatim ad parietes Ecclesiæ, ac ad terram Cemeterii, præsertim ad loca contaminata. Quo facto, redit ad

locum, ubi incepit aspergere, et stans dicit:

Orémus.

Omnípotens et miséricors Deus, qui sacerdotibus tuis tantam præ cæteris grátiam contulisti, ut quidquid in tuo nómine digne, perfectéque ab eis ágitur, a te fieri credátur: quæsumus imménsam cleméntiam tuam, ut quod modo visitatúri sumus, vísites, et quidquid benedictúri sumus, bene ✠ dicas; sitque ad nostræ humilitátis intróitum, Sanctórum tuórum méritis, fuga dæmonum, Angeli pacis ingrèssus. Per Christum Dóminum nostrum.

R. Amen.

Deinde Sacerdos incipit Litanis omnium sanctorum (ut ad calcem libri,) et ingreditur Ecclesiam cum Clero, cantando eas: acceditque ante Altare manus, coram quo genuflectit: cumque dictum fuerit: Ut omnibus fidelibus defunctis réquiem ætérnam donáre dignéris: R. Te rogámus, audi nos; Sa-

cerdos surgit, et clara voce dicit:

Ut hanc Ecclésiám, et Altáre hoc, ac Cœmetérium purgáre, et reconci- liáre dignéris. R. Te rogámus, audi nos.

Quibus dictis, rursus genuflectit, et Litanie perficiuntur. Quibus finitis, Sacerdos versus ad dictum Altáre dicit: Orémus.

Et Ministri: Flectámus génuá. R. Leváte.

Præveniát nos, quæsumus Dómine, misericórdia tua: et intercedéntibus omnibus Sanctis tuis, voces nostras cleméntia tuæ propitiatiónis anticipet. Per Christum Dóminum nostrum.

R. Amen.

Deinde Sacerdos genuflectit ante Altare, et se signo crucis muniens, clara voce dicit: Deus, in adjutórium meum inténde; tum surgit, et Chorus, seu adstantes Clerici respondent: Dómine, ad adjuvándum me festína. Et Sacerdos stans, dicit: Glória Patri, et Fílio,

et Spiritui Sancto. *R.* Sicut erat in principio, et nunc, et semper, et in sæcula sæculórum. Amen.

Quo dicto, Sacerdos inchoat, Clero prosequente, Antiphonam:

Exsurgat Deus, et dissipentur inimici ejus: et fugiant, qui odérunt eum, a facie ejus.

Psalmus 67.

In ecclesiis benedicite Deo Dómino, * de fontibus Israël.

Repetitur Ant.

Ibi Bénjamin adolescéntulus, * in mentis excéssu.

Repetitur Ant.

Príncipes Juda, duces eórum: * príncipes Zábulon, príncipes Néphtali.

Repetitur Ant.

Manda, Deus, virtúti tuæ: * confirma hoc, Deus, quod operátus es in nobis.

Repetitur Ant.

A templo tuo in Jerúsalem: * tibi offerent reges múnera.

Repetitur Ant.

Increpa feras arúndinis, congregatio taurórum in vaccis populórum: * ut excludant eos, qui probáti sunt argénto.

Repetitur Ant.

Dissipa gentes, quæ bella volunt: vénient legáti ex Ægypto: * Æthiopia præveniet manus ejus Deo.

Repetitur Ant.

Regna terræ, cantáte Deo: * psállite Dómino.

Repetitur Ant.

Psállite Deo, qui ascendit super cœlum cœli, * ad Oriéntem.

Repetitur Ant.

Ecce dabit voci suæ vocem virtútis,

date glóriam Deo super Israël: * magnificéntia ejus, et virtus ejus in núbi-
bus.

Repetitur Ant.

**Mirábilis Deus in Sanctis suis, Deus Israël ipse dabit virtútem, et fortitú-
dinem plebi suæ: * benedíctus Deus.**

Et non dicitur Glória Patri, sed An-
tiphona repetitur. Interim dum Anti-
phona et Psalmi prædicti dicuntur, Sa-
cerdos circuit Ecclesiam intrinsecus as-
pergendo: aspergit etiam specialiter lo-
ca contaminata. Quo facto stans in
Presbyterio versus ad Altare, dicit:

Deus, qui in omni loco dominatiónis
tuæ clemens et benignus purificátor
assístis: exáudi nos, quæsumus, et concé-
de; ut in pósterum inviolábilis hu-
jus loci permáneat benedíctio, et tui
múneris beneficia univérsitas fidélium,
quæ súpplicat, percípere mereátur. Per
Christum Dóminum nostrum.

R. Amen.

Deinde dicitur Missa de die occur-
renti.

† Simplex Sacerdos tantum ex pri-
vilegio Sedis Apostolicæ potest Eccle-
siam ab Episcopo consecratam recon-
ciliare, et tunc utatur ritu in Pontifi-
cali præscripto; procedatque indutus
amictu, alba, cingulo, stola, et pluvia-
li albi coloris, adhibitis secum aliis
Presbyteriis, et Clericis superpelliceis
indutis, cum aqua ab Episcopo ad hunc
usum ritè benedicta.

RITUS

**BENEDICTIONIS APOSTOLICÆ IN
ARTICULO MORTIS**

**A SACERDOTIBUS AD ID DELEGATIS
IMPETIENDÆ.**

Benedictio in articulo mortis cum soleat im-
petiri post Sacramenta Poenitentiae, Eu-
charistiae, et Extremæ Unctionis illis in-
firmis, qui vel illam petierint, dum sana
mente et integris sensibus erant, seu verisi-

militer petiissent, vel dederint signa contritionis: impertienda iisdem est, etiam si postea linguae, caeterorumque sensuum usu sint destituti, aut in delirium, vel amentiam inciderint. Excommunicatis vero, impenitentibus, et qui in manifesto peccato mortali moriantur, est omnino deneganda.

Habens praedictam facultatem, ingrediendo cubiculum, ubi jacet infirmus, dicat: *Pax huic domui, etc.* ac deinde aegrotum, cubiculum, et circumstantes aspergat aqua benedicta, dicendo Antiphonam: *Asperges me, etc.*

Quod si aegrotus voluerit confiteri, audiat illum, et absolvat. Si Confessionem non petat, excitet illum ad eliciendum actum contritionis; de hujus Benedictionis efficacia ac virtute, si tempus ferat, breviter admoneat; tum instruat, atque hortetur, ut morbi incommoda ac dolores in anteactae vitae expiationem libenter perferat, Deoque sese paratum offerat ad ultro acceptandum quicquid ei placuerit, et mortem ipsam patienter obeundam in satisfactionem poenarum, quas peccando promeruit. Tum piis ipsum verbis consoletur, in spem erigens, fore, ut ex divinae munificentiae largitate eam poenarum remissionem, et vitam sit consecuturus aeternam.

Sacerdos dicat:

V. Adjutorium, etc.

R. Qui fecit, etc.

Ant. Ne reminiscaris, Dómine, delicta famuli tui (vel ancillae tuae): neque vindictam sumas de peccatis ejus.

Kyrie eléison. Christe eléison. Kyrie eléison

Pater noster.

V. Et ne nos inducas in tentationem.

R. Sed libera nos a malo.

V. Salvum fac servum tuum (vel ancillam tuam, et sic deinceps).

R. Deus meus, sperantem in te.

V. Dómine, exáudi, etc.

R. Et clamor meus, etc.

V. Dóminus vobiscum.

R. Et cum spíritu tuo.

Orémus.

Clementissime Deus, Pater misericordiarum, et Deus totius consolationis, qui neminem vis perire in te credentem, atque sperantem: secundum multitudinem miserationum tuarum respice

ce propitiū famulum tuum **N.**, quem tibi vera fides, et spes christiāna commēdat. Visita eum in salutāri tuo, et per Unigēniti tui passiōem et mortem, ōnium ei delictōrum suōrum remissiōnem et vēniam clemēter indulge: ut ejus ānima in hora ēxitus sui te iūdicem propitiātum invēniat, et in Sāguine ejūdem Filii tui ab omni mākula ablūta, transire ad vitam mereātur perpētuum. Per eūdem Christum Dnm nostrum. **R.** Amen.

Tum dicto ab uno ex Clericis adstantibus Confiteor, Sacerdos dicat: Misereātur, etc.

Deinde:

Dōminus noster Jesus Christus, Fīlius Dei vivi, qui beāto Petro Apōstolo suo dedit potestātem ligādi, atque solvēdi: per suam piīssimam misericōrdiam recipiat confessiōnem tuam, et restituat tibi stolam primam, quam in baptīsmate recepisti: et ego facultate mihi ab Apōstolica Sede tribūta,

indulgētiām plenāriām, et remissiōnem ōnium peccatōrum tibi concedo.

In nōmine Patris, et Filii, et Spīritus Sancti.

Per sacrosāctæ humanæ reparatiōnis mystēria, remittat tibi omnipotens Deus omnes præsētis et futūræ vitæ pœnas, paradīsi portas apēriat, et ad gaudiā sempitērna perdūcat. Amen.

Benedicat te omnipotens Deus, Pater, et Filius, et Spīritus Sanctus.

Amen.

Si vero infirmus sit adeo morti proximus, ut neque Confessionis generalis faciendæ, neque premissarum precum recitandarum tempus suppetat, statim Sacerdos Benedictionem ei impertiat.

BENEDICTIO

PUERI

AD OBTINENDAM SUPER IPSUM MISERICORDIAM DEI.

V. Adjutōrium, etc.

- R. Qui fecit, etc.
 V. Dóminus vobíscum.
 R. Et cum spírítu tuo.

Orémus.

Dómine Jesu Christe, Fili Dei vivi, qui dixísti: Sinite párvulos venire ad me, tálíum est enim regnum cœlórum; super hunc púerum tuum virtútem bene **✠** dictionis tuæ infúnde, ac ad Ecclésiæ et paréntum illíus fidem ac devotiónem respice; ut virtúte ac sapiéntia apud Deum et hómines proficiens, ad optátam pervéniat senectútem, et salútem consequátur ætérnam. Qui vivis et regnas in sæcula sæculórum.

R. Amen.

Psalmus 112.

Laudáte, púeri, Dóminum: * laudáte nomen Dómini.

Sit nomen Dómini benedíctum, * ex hoc nunc, et usque in sæculum.

A solis ortu usque ad occásum, * laudábile nomen Dómini.

Excelsus super omnes gentes Dóminus, * et super cœlos glória ejus.

Quis sicut Dóminus Deus noster, qui in altis hábitat, * et humília respicit in cœlo, et in terra?

Súscitans a terra ínopem, * et de stércore érigens páuperem:

Ut cóllocet eum cum princípibus, * cum princípibus pópuli sui.

Qui habitáre facit stérilem in domo, * matrem filiórum lætántem.

Glória Patri. Sicut erat.

Kyrie eléison. Christe eléison. Kyrie eléison.

Pater noster, dicitur secreto.

V. Et ne nos indúcas in tentatió-
nem.

R. Sed líbera nos a malo.

Benedíctio Dei omnipoténtis, Pa-
tris, et Fí **✠** líi, et Spírítus **✠** Sancti,
descéndat super te, et máneat semper.

R. Amen.

BENEDICTIO
VOLUCRUM.

Deus, univérſæ cōditor natúræ, qui inter cæteras diversárum creaturárum spécies, pro humáni géneris usu étiam volatílium genus ex aqua prodúcere dignátus es; de quibus Noë ex arca egrédiens holocaústum tibi plácitum obtulit; et qui pópulo tuo ex Ægypto edúcto per Móysen servum tuum, munda ab immúndis ségregans, ut de iis éderent, præcéptum dedísti: te súpplices rogámus, ut has mundárum ávium carnes bene ✠ dícere, et sancti ✠ ficáre dignéris; ut quicúmque ex iis coméderint, benedictiónis tuæ abundántia repléantur, et ad æternæ vitæ páscua perveníre mereántur. Per Christum Dóminum nostrum.

R. Amen.

BENEDICTIO
APUM.

- V. Adjutórium, etc.
R. Qui fecit, etc.
V. Dóminus vobíscum.
R. Et cum spírítu tuo.

Orémus.

Dómine Deus omnipotens, qui creásti cœlum et terram, et ómnia animália super ea et in eis existéntia, ut eis uteréntur hómines; quique jussísti per minístros sacrosáncæ Ecclésiæ céreos ex opéribus apum edúctos in templo, dum sacrum perágitur ministérium, in quo conficitur et súmitur sacrosáncum corpus et sanguis Jesu Christi Filii tui, accéndi: descéndat tua sancta bene ✠ dictio super has apes et hæc alveária; ut múltiplicent, fructíficent et conservéntur ab ómnibus malis, ita ut fructus ex eis proveniéntes ad laudem tuam, Filii et Spírítus Sancti, beatis-

simæque Virginitatis Mariæ dispensentur.
Per Christum Dóminum nostrum.

R. Amen.

Et alvearia aspergantur aqua benedicta.

BENEDICTIO

ANIMALIUM PESTE

VEL ALIO MORBO LABORANTUM.

Sacerdos superpelliceo et stola violacea indutus, dicat:

V. Adjutorium, etc.

R. Qui fecit, etc.

V. Dómine, non secúndum peccata nostra fácias nobis.

R. Neque secúndum iniquitates nostras retríbuas nobis.

V. Hómines et juménta salvábis, Dómine.

R. Quemádmódum multiplicásti misericórdiam tuam, Deus.

V. Aperis tu manum tuam.

R. Et imples omne animal benedictióne.

V. Dómine, exáudi, etc.

R. Et clamor meus, etc.

V. Dóminus vobíscum.

R. Et cum spíritu tuo.

Orémus.

Deus, qui labóribus hóminum étiam de mutis animálibus solátia subrogásti: súpplices te rogámus; ut sine quibus non álitur húmána condítio, nostris fácias úsibus non períre. Per Christum Dnm nostrum. R. Amen.

Orémus.

Misericórdiam tuam, Dómine, súpplices exorámus: ut hæc animália, quæ gravi infirmitáte vexántur, in nómine tuo atque benedictiónis virtúte sanentur. Exstinguátur in eis omnis diabólica potéstas, nec ulteríus agrórent. Tu eis, Dómine, sis defénsor vitæ, re-

médium sanitátis. Per Dóminum nostrum Jesum Christum Fílium tuum: qui tecum vivit, etc. **R.** Amen.

Orémus.

Avéte, quæsumus Dómine, a fidélibus tuis cuncta propítius flagélla: et morborum in animália sæviéntium depélle perníciam; ut quos mérito plectis devios, fóveas tua miseratióne corréctos. Per Christum Dóminum nostrum.

R. Amen.

Et aspergat aqua benedicta.

BENEDICTIO

PECORUM ET JUMENTORUM

GRAVI INFIRMITATE VEXATORUM.

V. Adjutórium, etc.

R. Qui fecit, etc.

V. Dóminus vobíscum.

R. Et cum spíritu tuo.

Orémus.

Misericórdiam tuam, Dómine, súpplices exorámus: ut hæc animália, quæ gravi infirmitate vexántur, in nómine tuo, atque tuæ bene **✠**dictiónis virtúte sanéntur. Exstinguátur in eis omnis diabólica potéstas; et ne ultérrus ægróteant, tu eis Dómine, sis defénsio vitæ, et remédium sanitátis. Per Dóminum nostrum Jesum Christum Fílium tuum: qui tecum vivit et regnat in unitate Spíritus Sancti Deus, per omnia sæcula sæculórum. **R.** Amen.

BENEDICTIO

SALIS VEL AVENAE

PRO ANIMALIBUS.

V. Adjutórium, etc.

R. Qui fecit, etc.

V. Dóminus vobíscum.

R. Et cum spíritu tuo.

Orémus.

Dómine Deus, ómnium cónditor et conservátor, cujus in manu est ánima omnis vivéntis, et spíritus univérsæ carnis: exaúdi, quæsumus, tuórum fidélium preces, et hanc creatúram salis (vel avénæ) tua bene **+** dictióne, tuæque invisíbilis operatiónis virtúte perfúnde; ut animália, quæ necessitatibus humanis tribúere dignátus es, cum ex eo (vel ex ea) gustáverint, ab omni morbo illæsa reddántur, et a maligni spíritus incúrsu, te protegénte, custodiántur. Per Christum Dóminum nostrum. R. Amen.

Aspergat Sal vel Avenam aqua benedicta.

BENEDICTIO

STABULI

EQUORUM, BOUM ET ALIORUM
ARMENTORUM.

Adjutórium, etc.

R. Qui fecit, etc.
V. Dóminus vobiscum.
R. Et cum spíritu tuo.

Orémus.

Dómine Deus omnipotens, qui Fílium tuum unigénitum, Redemptórem nostrum, in stábulo nasci, et inter duo animália in præsepío reclinári voluísti: béne **+** dic, quæsumus, hoc stábulum, et defénde illud ab omni nequítia vel versútia diabólicæ fraudis; ut juméntis, pecóribus, ceterisque animántibus efficiátur locus sanus, et ab omni impugnatione secúrus. Et quóniam cognóvit bos possessórem suum, et ásinus præsepé dómíni sui: misericórditer tribue fámulis tuis, quos ad imáginem tuam creásti, paulo minus ab Angelis minuísti, et sub quorum pédibus subjecísti oves et boves univérsas. Insuper et pécora campi; ne comparéntur juméntis insipientibus, et ne fiant sicut equus et mulus, quibus non est intellectus; sed te solum Deum auctó-

rem bonórum ómnium agnóscant, et in servítio tuo fidéles perseverént, quá-
tenus de percéptis munéribus tibi grá-
tias exhibéntes, beneficia potióra per-
cípere mereántur. Per eúndem Chris-
tum Dnm nostrum. R. Amen.

Deinde, si tunc in stabulo congrega-
ta fuerint animalia, addere poterit Sa-
cerdos sequentes Orationes: ✠

Orémus.

Omnipotens sempitérne Deus, qui glo-
riósum beátum Antónium, váriis ten-
tatióibus probátum, inter mundi hu-
jus túrbines illæsum abire fecísti: con-
céde fámulis tuis; ut et præcláro ipsíus
proficiámus exémplo, et a preséntis vi-
tæ periculis ejus méritis et intercessió-
ne liberémur. Per Christum Dóminum
nostrum. R. Amen.

Orémus.

Bene ✠ dictionem tuam, Dómine, hæc
animália accípiant: qua corpore sal-

véntur, et ab omni malo per interces-
sionem beáti Antónii liberéntur. Per
Christum Dnm nostrum. R. Amen.

Postea aspergat aqua benedicta sta-
bulum et animalia.

Eduardo Ayllón.
chmccaranea.